

Mohd Juhar Harun Raih

Undi Majoriti Dalam Pemilihan

Presiden MPP UMS Sesi 2012/2013

Mohd Juhar Harun dilantik sebagai Presiden Majlis Perwakilan Pelajar Universiti Malaysia Sabah (UMS) sesi 2012/2013 setelah berjaya meraih 6,989 undi sekaligus menjadi calon yang mempunyai jumlah undi tertinggi pada Pilihan Raya Kampus (PRK) yang berlangsung di Dewan Kuliah Pusat UMS.

Membawa tagline "Peneraju Mahasiswa Cemerlang", pelajar dari Sekolah Sains Sosial (SSS) itu dilantik sebagai peneraju kerusi pimpinan mahasiswa UMS ketika pembentukan kabinet diadakan sebaik proses pengiraan undi selesai.

Juhar yang berasal dari Lahad Datu Sabah berkata, beliau akan berusaha untuk menjadi wakil pelajar yang terbaik ke arah memastikan pelajar ums terus seiring dengan pihak pengurusan universiti ke arah mencapai kecemerlangan pengajian tinggi.

Sementara itu, Naib Canselor UMS, Prof. Dr. Harun Abdullah mengulas mengenai PRK tahun ini berkata, budaya keluar mengundi dalam kalangan mahasiswa UMS amat membanggakan dan ianya perlu diteruskan pada tahun-tahun akan datang.

"Kita turun padang dan menggerakkan jentera kita agar para mahasiswa sedar akan kepentingan mengundi. Mereka perlu tahu di mana harus menyuarakan kebimbangan dan permasalahan yang mereka hadapi", Katanya

Dalam memperjuangkan hak dan kebajikan mahasiswa UMS, Mohd Juhar Harun bersama saf kepimpinannya akan mengembleng tenaga dan usaha untuk memartabatkan kebajikan mahasiswa dan mahasiswi dalam Universiti Malaysia Sabah, selaras dengan perjuangan dan manifesto yang dibawa semasa Pemilihan MPP baru-baru ini disamping bersama pihak pengurusan universiti untuk mewujudkan kampus yang harmoni tanpa ada ansir politik luar.

Pada PRK tahun ini sebanyak 10 kerusi umum dipertandingkan dengan pecahan 7 kerusi di Kampus Induk, 2 di Kampus Antarabangsa Labuan dan 1 di Kampus Sandakan. Bagi kerusi sekolah, sebanyak 28 kerusi dipertandingkan dengan setiap sekolah memperuntukkan 2 kerusi.

Bertunjangkan slogan "Satu Arah Satu Tujuan, Merealisasikan Harapan Menjulung Kesarjanaan" Mohd Juhar Harun dan saf kepimpinannya berusaha untuk memartabatkan bidang kesarjanaan untuk melahirkan mahasiswa yang cemerlang disamping menjaga keharmonian universiti.

"Alhamdulillah, syukur ke hadrat Allah S.W.T kerana telah memberikan saya satu amanah yang saya rasa cukup berat untuk dipikul sebagai seorang pemimpin mahasiswa dan saya akan menganggapnya sebagai satu cabaran untuk memimpin diri saya bersama rakan-rakan yang lain untuk menaikkan nama Universiti Malaysia Sabah hingga ke peringkat global. Insyaallah" kata Mohd Juhar.



“ Satu Arah Satu Tujuan,
Merealisasikan Harapan
Menjulung Kesarjanaan ”